

Sin ils fastizs da l'absint en la Val-de-Travers

■ (rtr) Bunamain 100 onns è stà scumandà l'absint. Quel vinars legendar ha ses origin en la Val-de-Travers. E là, a Môtiers, ha quels dis avert l'emprim museum ch'è deditgà cumplainamain a l'istorgia dal vinars verd, la «Maison de l'absinthe». Dapi il 18avel tschientaner vegn l'absint, quella spirituosa ferma cun gust d'anis, brischada en la Val-de-Travers. L'emprim sco medischina, pli tard sco spirituosa che ha chattà oravant tut blers amis en Frantscha. Il 1910, suenter in mazzament en il chantun Vad ed in'iniziativa dal pievel, èn la produziun e la vendita da l'absint vegnidas scumandadas en Svizra. Quai che n'ha betg impedì che blers han brischà l'absint a moda clandestina.

Oz vegnan producids en la Val-de-Travers passa 120 000 liters absint per onn. Cun ina svieuta annuala da passa 10 milliuns francs è quel puspè ina pitga impurtanta da l'economia plitost falombra en il vest dal lai da Neuchâtel. La «fée verte», la diala verda sco l'absint vegn era numnà, haja dentant anc bler potenzial, è persvadi *Yann Klausser*, il directur dal museum nov.

Restituir il renum mundial da l'absint da la Val-de-Travers duai il museum ch'è situà a Môtiers en l'anteriura dretgira districtuala. Gist là nua che la polizia ed ils derschaders han durant la proibiziun dumandà pled e fatg dals numerus destillaturs clandestins. Tar lur visita duain ils plirs 10 000 visitaders che vegnan spetgads mintg'onn sa far in maletg da la tradiziun da l'absint. Quai cumpiglia natiralmain l'istorgia e las legendas ch'i dettia enturn il vinars verd. Dentant anc bler dapli. Per exempel l'influenza che l'absint haja gi sin la cultura. Uschia giudevan er ils picturs Paul Gauguin e Vincent van Gogh sco er ils scrivents Ernest Hemingway ed Oscar Wilde l'effect enivrant dal vinars cun sia aura mistica. La «Maison de l'absinthe» porscha dentant er insatge per il nas ed il gust. Ils visitaders pon perscrutar las numerusas ervas ch'i dovra per brischar il vinars ed en l'ustaria pon ins degustar 15 differents absints da la regiun.